



Editorial

Pathian thilsiamte nang in bang tin la mang em?

Pathian mapuina zal in hun buai um leh haksatna tamtakte tawh kalsuangto khawmzel in, tun kum tawp lam tungtheita l um ziak un Lalpa lopina i pia masa hi. Chun, Khawvel buai umna gam ah khawsa himaleu hinle, Lalpa'n a Kochuam KSP huapsung ah District tin a Kum-tawp Khawmpi mangzo thei ta eikawi zia kin lopina ipia kit hi. Buaina kikal ah hun pha tak mu ihi zia kun anuai ahin Pathian thilsiamte bang gual in i mang em ti tawmchan ala en hitiu..

Hun/Phat: Pathian in mihing zosia kibang chiat ah a piakte laka khat chu hun/phat hi ahi. Mi Hausa ten le nikhat a dakkal 24 amang chiat ua, genthei ten le dakkal 24 amang chiat hi. Hun/Phat kiti hi achia nung leh thil pani ei nutsia piak un ahi, zia chu result(nasep ga) leh regret(kisikna) ahi. Ziazia kchun, la kisiklo na ding in la hun/phat matdan thiam in.

Huithiang: Pathian in mihing zosia Hinna hu kibangchiat in apia, amang thiamten zingkal matak a thou in Huithiang adawn in adam thei pi sek ui. Ahinla, mi khenkhatte chun taksa'n achou lo

dumzial leh thildang a khu thei te hiplut nan a hinkhua amang sek ui.

Tui: Pathian in mihing hinna ding in tui eipia ui. Mihing khenkhat-en bawngnawi tawh kihel in, khenkhatte chun coffee tawh kihel in taksa dam theinan amang ui. Ahinla khenkhat te chun vang Ju tawh kihel in, azaw leh ahinkhua siatna leh sawtlo nan amang sek un ahi.

Thapi: Pathian in mihing zosia thapi vak apia chiat in zia thapi vak nuai ah Pathian lopina puan-daw na in pakna lasa a um ui. Khen khatte chun lungleng leh puldo nan thavak nuai in mitthi

luang pum in hinkhua ala mangkit zel ui.

Nisa Vak: Pahian in mihing zosia a din Nisa vak kilawm tak mai apiak chu khenkhat ten Pathian ah limna/ kipakna, nek hawlina leh go ding hawlina mang ui. Khen khatten vang go thil suk-mang na, hinkhua chatvai na, da na leh kikhennan ala mang kit sek ui.

Pathian in leisiat chung leh tuipi nuai ah gancha chi chuam chuam chiat asiam hi. Ziate chu khenkhat ten ki thoina nei in, khenkhat chun a Pathian ding ua ki siam khawm in a um ui. Himaleh ei un vang gilpi va naleh limnan l mang sek uh ahi.

Pathian thilsiam zosia hi ama lopi kipuandaw na ding ah asiam

ahi in. Ziate haw zosia chung ah thunei leh vaihawm ding in mihingte hi ahi ei siam uh. Zia chu ahi ziakin nang in Pathian thilthawn piakte hi bang gual in la mang em? Lei lam limna leh nawpsak na ah hinkhua mang la hi chun thutan vaihawmni phat leh pathian ma la ding zuau na diam? Hun leh ni te hi Pathian lopina ding ah mang ding ah chial a umte chu nang le kei ihi ti hiatmil lo ding ahi.

--o0o--

DAMLAI NITUM KUAN:

KL Muana Khaute

Khawvel a thilsiam zosia hin pian hun, lunlaini/Lûnhun leh nitum kuan hunbi anei chiat hi. Piantil duthu a chun mailam a kipakna leh limna Cheng a hinkhua mat di chu duthusam chiat a hi, ahinla! kinepna gual a hunnawp leh kipakna him him mang lo a lungkham na leh kana mai damlai hun mang tawp ziang le a um hi. Ahinla khen khat te chu kipak na bukim mang ziang thei lo um male chantawk ah, lung awia hinkhua mang le aum hi.zia te hi thilsiam te lak a mi vangpha huntawk a ngai thei a hi.

Mihiam te khawvel thil a lawtin ah, hinkhua nawp tak a mang ding a ki ngaitua pawl a um a,aki nepna gual tak a lawting thei lo in a mihiam pi te chung a lung awi theilo leh siam tu chung a punchiak tam pi a um hi, zia chu Pathian in bang ding a siam a hiu em? ti aki hetlo ziak un suanlam di tam tak a nei sek ui.Hina kihiat hi thil pawimaw tak a hi. Ahinla! ihi na ki hiat dawh thei na hi mihiam a pat a hi puan, Pathian apat a hi tei di a hi. Ama chu bangkim siamtu leh nei tu a hi ziak in ama kiang dawn leh hawl te chu lawtinna bukim chu a musek uh a hi.

Alangkhat lam a gel a chun Pathian in ei siam a Khan khawvel a thilsiam zosia enkawl

di leh ki vakna ding ei piak dawh a hia,chutia mihiam te khut a thilsiam zosia Pathian in ei piak a hi tak ngal a hi leh l lung ngai na di leh iki pak na ding chu ei khut a um a hi tai.Zia te mat dan thi-am a iki pakna ding a imat thei lo chun, Pathian thil thawn piak chu amat dan helo kihimai lo di a hem ka ti chang a um hi.

Mihiam dâm-kum hi a ki bang puan akhen te mikhut-lum a thi,a khen te accident,akhenkhatte suicide,akhente natna ziak a thi te leh a dang dang a um a,mihiam ngai achun a damsawt chu mivangpha aki ti zing lai a,Akhen khat-te dam sawt hi lungngaina leh thawkgimna te a hi thei hi.Dam sawt leh dam chawm chu thuchuam in vak kaw i ta leng,

sawtpi dâm ah mihiam chanpi a dinga nawksak bep hilo, siam tu a dinga le phachuamna umlo hial a damsawt le um thei dan a hi. Chutia damsawt a phachuam lo a dam sang a chun kum tam ta lawlo dam ah, I mihiam chanpi leh Pathian a ding a thil phachuam neu khat sep dawh chu lukhawng a nei zaw diam? a ti sek hi a bang chu hi tale Pathian kumtiam chan dan a thil pha sep chu a lul zaw him him hi.

Mihiam te hi ngaidan a ki bang puan,dawidan leh 'PAW-MDAN' te aki bang kim puai. Kumtam dam te le alungtup uh leh a ngaichat uh subukim zolo in,ahun nunung lam un 'Dâmlai ni' tum kuan nitak lam bek in ti- in a thum ngawi ngawi sek ui.A bang chu hitale, mihiam te hin nunlui mualliamsa leh mailam- ginna mit a mu kinepna ki pak um hung tung di chu thangai in a thum ngut ngut un a lung uh alêng sek hi.

Mihing duthusam kimlo dan chu etsak na din 'Alexander the great' kha thîpai chu nuam nai mama lo di a hia chule, ALalna te,Ago te, it ma ma chu hi ma ma ding ah hi, migentheï te piak mai gaw lo in a Thankhuk tiang

lampi siam dangka'n a zem sak a,alei taksa muat mai di chule sana chitin in a zem a, Aluang ngei le Doctor te a ki zawn sak hial a hi.

Zia gual chu ihi mihiam te hi, I chi inam in lkhawsakna di Ballei or Tuilo nei chuam na ding Thingnuaimi ,Tribe Orgination ten thunei tu te kiang a ki Intum Chuan ding 'Unau pathum ten zi a hun nei chiat phat uh leh a Pan a thei Kham Kham in a In Chuan sek a hi', Ahinla,tulai chu Inchuan nuam a umle le thunei te bep-hilo eile i unau ki in Chuan kithang-sia itam ui. Chutia, Inchuan di phallo ahiu leh la chavo ki bang leh thunei kibang bek ki pe leu hin kuama Inchuan nuam mawng umlo ahia maw !Khaile khawvel hi du-âm nan adim mi Khan tona ding gel lo buai na di bep bawl te hi. 'Lani lahun a hung tun phat leh lasep ga chu nei-ngei di la hi ziak in' kawt a ki-Hawn lai a hin panpitu leh lemna siamtun hun pang in zia chu nang di leh la suan te a ding malzawl na hung hi zawn a.Kuale! Agitlo haisan a Pathian keng bul aki tulut chu Pathian cha sak a um di ahi ngal a.

GINGTUTE NEK HAWLNA PAN LAK DING DAN

Gen. 2:15; 3:17-19; Thugentu 9:10

-Rev. Seilunlal Vaiphei

Mi zosia'n nek leh dawn i pawimaw chiat a, ziaziakchun, nek hawl a ngai hi. Mi taima leh lem heten a nei tam mai ua, taimatak ah semte chung ah vangsiat ziak ah neilo le a um thei tho hi. Himaleh a tangpi in Pathian hi a thudik a, diktak leh taima tak ah semte chu a sepman uh a pe sek a, a khawsa-ul man uh a malzawl tei sek hi.

NEK HAWLNA UMZIA:

Nek hawlna ti hin nek leh dawn bak in i pawimaw thil dang dang le a huap khawm hi. Zia i pawimaw chuam chuamte chu i nei theina ding ah i sep zosia chu nek hawlna chu ahi mai hi. Mi nuai ah sem i hi em? eima na sem i hi em? chule nek hawlna ahi tho hi.

Nek muna ding in nasep a ngai a, gitlona mihing apûk masang in Adam kiang ah Pathian in a nâ ding apia, zia hin nasep chu mihing in a pianpi him him ahi ti a sulang hi. Pukna chun nasep pawimawna chu sumang chuam lo in a suhaksa zaw diak ahi.

Adam chu Eden huan enkawl leh veng ding ah Pathian in na a pia, gamsa zosia chung ah thuneina a pia, zia gualma chun

mi zosia'n i hinna ding leh nek muna ding in nasep i pawimaw chiat ui. Gim tak ah khawsa-ul pawt zung zung pum ah nasem ah ne ding in Adam chu thupiak ahi. Zia chu tuni tiang in a danglam diaklo ahi.

NEK HAWLNA CHI CHUAM CHUAM:

Siamtil apat mihingte hi nâ sem ah nêk hawl ding ihu ti thu piak ahi. I nisin nek hawl dan uh hi a chuam chuam himaleh atangpi achun tuni tiang in Lou bawl, Sawlkar na, Sumkawlei, Nikhawtha kilaw leh thil dang dang aten nek hawl nan hinkhua i mang ui.

NEK HAWLNA NASEP DING DAN:

Pathian in mihing zosia hi

thiamna khat chiat a pia, zia chu a nek hawlna ding chu ahi. A thiamna chu mang in nek hawl intin dik tak, thiangtho leh gin um taka amat a pawimaw hi.

Taima tak ah sep: Lal Jesu'n, "Ka Pa'n tu tiang in na a sem zing ahi," ati(John 5:15). Ama gingtute chu a taima ding ahi. Sawlchak Paul in le ama ngei in taima tak in nâ a sem sek hi ti a gen hi. "Ka mite chu tâksap a nei ngailo na ding un na phachuam sem ah kimang zing ding in hil in la, a mawk um lo ding uh ahi," ti in Tita chu a filkho ahi.

Mihing khat chu a nek hawlna a taimat ngei ding ahi. Lou neitu, sum dawngtu leh sepna dang dang ah semtute chu le a taimat chiat ding uh ahi. Zia gual a chun Office ah semtute chule taima taka aseplo uh chun a buai um ma ma sek hi. Sepna mun ah ginum leh taima taka semte chun kipak man a mu ngei sek ui. Mat. 25:14-30 in agen gual in talent dawngtu pa kha le a taimat ziaakin apu kipak na chang in a kaisang hi ti imu ui.

Ginum tak ah sep: Pathian hi a taimat bep le hilo in a gin um

hi. Ama gingte chun taimatna leh ginumna hi a nei ding ua pawimaw ahi. Gingtute chu i um na, mi dang chung leh sepna mun ah i ginumnau chu suklat zel ding ahi. Semtu khat a sepna mun ah vaigei zing leh a na ngai pawimaw theilo mi chu a ginum lo tina ahi. Hun vawp dik hi mi ginumte umdan ahi.

Khenkhatte chun sep ding um lo ziak a, asepnâ mun nusia a vâkman san mai sek ui. Khawi chia ahi le kihelo ah ngak ngak ziang ti le a um sek hi. Ziate chu semtu ginum kiti thei lo ahi. Thi-angtho leh ginum taka semtu hi ding apawimaw a. Mite ettawn-tak thei ding leh mi dangte muan ngam semtu hi ding apawimawi.

Lungawi takin: I sepna hin lungawi tak ah sep ding apawimawi. Eima lawkna ding bep ngaitua tâkluat lo din aphai. Lal Jesu'n, "Ei sawlpa dawi gual bawl leh a nasep hi ka an ahi," ati(John 4:34). Mihingte'n le i sepna chu lian in neu talehle hotu ten ei lemguat piak dan dan ah lungawi takin sem mai leu hin pha pen in'a.

I sepna mun chiat a hin Pathian na leh midang thasang

ah na semtu kahi ti ngaituana nei a nâ sep aphai. I sepna mun chiat ahin ginum phawt leu hin thil diklo tam tak a la umtate chu hung thiangtho tan tin bei mai tan'a. I dikna leh ginumna ziakin Path-

ian chu lopina leh chawihawina chang thei tan'a. I nisin hinkhua mat leh na i sep zing thei teu hi Pathian ei piak ahi dan hechian ta leu hen a nawp um ma mai.

--o0o--

SETAN HINA CHUAMCHUAM

-By Upa L.T. Khupa, Tuibuang

1. Pathian chate ihu tileh, khawvel pumpi hi migilopa thunuai ah um ahi ti i hiau hi (1 John 5:19).

Tulai khangthakte leh mi tamtakte chu setan dawilam leh program ahin a tallut zing uh a hi. Setan chun Pathian phalna chan tingin na a sem sek hi.

2. Setan chu tu ah thu-awilo chate chung ah sem zing pa thagau ahi (Eph.2:2).

Khrista batna kawng ah thagau thiangtho chun ei pui aguut lai in Setan in vang khris-ta batna kawng ah i pitin zelna ding ua, ahatlo zawnga gamhuaisia nei zaw dingin lemchang a hawl zing a hi.

3. Melma Diabol chu a nek ding hawl in avak vel vel hi(1Pet. 5:8).

Setan chun gingtu kitha-date, fimkhurlote, pauchap ngai-lote hi sualna(gitlona) thukzaw puilut gua'n a chang zing sek a hi. Gingtu kipuk a utlo chun a kithada ding ahi puai. (1Pet. 1:10) ah chun "Ziaziakchun sua-pite haw, ahun kona leh a telna chu hidet dingin taimat sua zaw diak tau in, zia chu la hiu chun bangma tik in kilik pua'n la'u".

4. Setan chu hektu ahi (Thupuan 12:10).

Setan chun gingtute chu a titlonau tawmcha mangin na-satak ah thiamlo chansak ah, hi

lungngai leh hi mangbat a gua sek hi. La titlona mang cha'n thiamlo hun chansak zel ding hi, Setan dawigual chu ahi. Khrista thisan ziaka thiamchang la hi takna ginglel dingin nasatakin la hetna(Thuak a) hun do sek ding a hi.

5. Setan chu themtu a hi(Thupuan 12:9).

Evi leh Adam sual(gilo) ah a puilut gual khan tulai gingtute hi sual ah puilut a guat zing a hi. Sual suak ah tan sak ding gua'n, taima tak in a hawl zing a hi. 2Tim. 3:13 ah chun "Ahin mi gilote leh mipha lem te ahung hawk zaw deu deu intiu in, mithem in amau le thepzaw in um in'au".

6. Setan chu hawtu(mudatu) ahi. Amin umzia hi hawtu ahem Diabol ahem tina a hi (Johan 8:44).

Hiatnate lungnatna leh munawplonate zosia hi dawktu bulpen chu Setan ahia, huatna hi tualthana tunsaktu a hi. Kaina khan anau Abel a tha ma khan ahua(muda) masa a hi kha!, setan thintlung chuh sualna'n a dim ah, mihing nun, Inkuan nun, pawl-

pi nun leh nam nun hisia dingin pan ala zing a. Pathian leh mihing hawtu(muda) pen a hi. Pathian ahaw zaw diam, mihing ka he puai. Ka gindan in Pathian a huat zawk ka gingcha'i.

7. Setan chu gulpi tek ahi (Thupuan 12:9, 20:2).

Zia hin Genesis hung 3 lam ei kawkmuchet ziang hi. Setan in Evi athep ding khan gual guala hung kilatsak hilo ata kha!? Ama kiang ah kipete sung in thitha chu alut sek a, amau chuh nei in a chenkhum sek hi. Matthai lam ch chun(Mat. 12:44-45) na'n "Ka pawtna In ma khan chiakit mai 'ing ka" atia. Ahungkit phat in zia In chu a hawmsa leh phi-atnam sa'n ava mu ta'n. Chang 45 "Tichun ava chia kit ah, ama sanga gitlo zaw thitha dang sagi ahun pui a, zia tak chun lut in a cheng tau a hi; zia mihing umdan nunungzaw chu a masa sangin ahung se zaw tai". Zia gual ma chun tulai khangthakte chung ahinle tung ding ahi a tia.

8. Setan chuh Belial ti ah ko ahin (2Kor. 6:15).

Belial ti chu Lulna him nei-lo tina a hia, maleh sual(gitlo) bul

tilehing kichian zawna.

9. Setan chu himangthaitu a hi
(2Kor. 6:15).

Lei kawkhuk tawp nei-lo neitupa ahi. Zia hi gamhuai(thitha) ten le va chia ding alau ma ma'u khah a hi. (Lk. 8:3) a chun, "Amau chun kawkhuk mawng bei ah sawl lut lo ding in a don tau a. Zia mun ngei ahin setan chuh kum 1000 sung kamkhum hi ding a hi. Tu'n ahi leh vang Lalpa'n matchak ding ah dawi nalai himai ina.

10. Setan chuh Dragon ahi
(Thupuan 12:3, 12:9, 20:2).

Setan chuh Dragon san

lianpi ti ah gen le ahia, zia hin a mizia a etsak na hithei ina. Thupuan ah chun zia dragon hin luchang pasagi leh Ki sawm anei a, alu ah lallukhuk pasagi le a khuk hi ati (Thupuan 12:3).

Genesis bung 3 ah Gul khah kum sang tamtak nung ah chun hung danglam in, Dragon lu hin thu hipukna etsak thei ina, ki chun hi ding tina etsak thei ina. Lu chun a thunun ah kite chun hi ding chuh ahiu a. Lu a tawi sin leh ki chun a zui zel ahi.

Zia thu ah kipat hin Sahang (setan thununna nuai ah um ding ahi ti a kichian a hi.

--o0o--

MÂNI-MASIALNA HINKHUA'N A PUIMANG

-Naocy Haokip

1 Timothi 6:10

_Dangka sum ngainat hi gitlona chitin bul ahi ngala; khenkhat in hau-sak nawpna ziakin ginna chu zamsan in, amau leh amau lungngaina tamtak a kisunkhum sek uh a hi.

- √. Bible I et leh, papsiat, Mâni-masial, du-am tite hi tamtak a kimu'n, tulai inle papsiatna hin mi tampi apui mang zing hi. Ahinla eima sum muna ding ahi phawt leh tia papsiatna hawle apha pha a gen le aki um kit tho ahi.
- √. Ahab lengpa du-am leh papsiatna ziakin Naboth Grep lei pha chu a enla tan, zia sanga hoizaw leh phazaw kibawl gaw leh le lengpa khat a dinga chu haksa lou hial ding ahi. Himaleh, minei thangsiatna lunggel anei tak ziaka chun ama a dingin kumtuang thina a suakdaw khawlaw ta ahi.
- √. Elisha suakpa Gehuzi du-am na leh etlana ziaka chun Naaman taksa damna leh hinkhua kisangna chu kipakpi ding agelpha tapua, Naaman in manbei ah asukdamna chu
- asumsial pi'n, etlana lungthim apat in sum chu aducha ta, ziaziaakchun apupa phalna guala Pathian min pan in zou agen in, Naaman sum chu ava kilak ta ahi. Zia chu ama ding leh a khanggui sunga umden di'n hansia a kilawdaw zaw ta ahi.
- √. Leng Saul thangsiat leh du-amna lungthim chun a tupa David tha di'n ahawl jingin, David in lawting taka gal azaw piak sek chu ama a ding ahi ti kigel lou in alenggam achu dan in a ngaitua a, hun hung chia zel in Pathian in ama leh achapate nikhat sungin asumang ta ahi. A tha guat zing David zawk chu Lalchutpha apeta ahi.
- √. Mihiam hin nei leh gou, sum leh pai bep a ngainat phat leh Pathian hepina chu amuthei sek lo uh ahi.
- √. Tunin ki ngaitua kit hitiu, Path-

ian in In leh Lou, Nei leh Gou chuleh kivakna dinga sepna hawi taktak apiaka hinkhua nuamtak a mang le um tei ding hui a. Zia tigual ah panmun/sepna hawitaktak haw chu Pathian in thilpha bawlina ding, ama suklopina dinga ei piak uh ahin, ahinla zia te ho chu geldawk talo in Mâni-masialna I dim zo tau a, eima phatchuamna ding cho I ngai-tua'u chun Pathian lungnatna hung chu tei ding ahi, ti geldawk hitiu.

√. Geha'zi hi apupa Elisha toh hun sawtpitak umkhawm jing leh kivawp zing ahui a, Pathian phatna leh mi lungsiatna, Pathian thilbawl theina zosia a hiatsuk kei chu ahi. Ahinla Mâni-masialna leh etlana adim zing ziaka chun sum leh pai, nei leh gou te ama a ding bep ah ala ki gela buaipi zing ala hi. Zia te haw chun malzawlina hilo in hansia lawna achang zaw ta a hi.

√. Tunin nang leh keile Pathian ging ah anungzui a I kingai lai inle, eima phatchuamna ding ahipo leh tia nekguk chakguk le khawksa talo ah bawl/ningam ziang le aki um kit tho

a hi.

√. Gehazi chun sum thangaina lungthim anei ziakin, Pathian mi suakpa khat ahina ah, abawl dinga kilawm lo Pathian min panin zou agen ah, thilsia abawl ah, ama lungkimna ahiphawt leh Pathian in pha asa na diam? tile buaipi lo khawp in etlana chun a dim ziakin sum chu ala ta ahi. "Lalpa mit chu muntin in a um a, mipha leh phalo a entha zing hi (Prov 15:3). A thilbawl zosia ngaidam dawt sangin selmang ding a gaw zaw nalai set ahi.

√. Tunin ei unle I geldaw ding ua dawi um chu, Eima phatchuamna ding, eima nawpsakna ding ahiphawt leh Pathian in ka thilbawl hi pha asa na diam? tile geldawk manlo khawp ah idawi-ingai muna dinga kinaw the-thu ah tai ziang le um ding ihui a, mihiam lunggel leh dawidan ho hi Pathian a dinga kawt kikam ahi, tihi geldaw zing a pawimaw ahi.

√. Gehazi Mâni-masialna hinkhua'n a puimang bang zat I um diam uh? Pathian apat chanvo thupi taktak leh malzawlina chuam chuam I chan teu haw hi ama suklopina mang

lo a, Mani-masialna, du-am-na zawk a imat khak uh chun, Gehazi chung a thiltung gual hi eima chung a le tung ziang thei ahi tih hi hemil pua hitiu.

√. I thilbawl zosia hi amasapen a Pathian in pha asa na'm? ti hi geldaw masak phawt angai ahi. Pathian lemsak lo, eiman nawpthu ah tawi-leh-chan ihi chun Mâni-masialna hinkhua'n a puimang te lak pang pha tei hitiu in, atawpna chu kumtuang thina hi ding ahi.

☐ **1 Korinth 6:10** ☐

_Guchate, huaihapte, zukham-te, mi vau mangte leh mi suamte chun Pathian gam lua pua'n ua.

☐ Chawmcha I vak holimnau asimdawk zosia lungsunga Pathian in hetchian theina lunggel ei hawnpiak tau hen. Taksa leh thagau a I kalsuanbe thei zelna ding un, Pathian in ima'u ei pui chiat taken....Amen!

--o0o--

TRINITY

~T.Upa Lamgoulal, Tangmual

Thumapui:

Amasa'n zia Trinity thugin chungchang ah genthei ding i um ziak un Pathian chu pakin um masa hen.

Zia Trinity thugin hi kichian takin i hetchian a ngai hi, chutilo chun taksan na lam tiangin ei subuai thei khat a hi.

Trinity um zia chu Pathian pathumte(3) te tina ahi pua'n, (Three in one) zia chu- Pa Pathian, Chapa Pathian chuleh Thagau Thiangtho Pathian amau zia hi pakhat ahi tho tina a hi. Zia gindan hi pawm theilo mani ngaidan ah la kawí ah pawm pawt le tamtak a um hi. Zia haw chu gen gua hilo in, ei un Bible Doctrine diktak ziltil dan hi zil ding i hi zaw'u.

Juda ten a hetthiamlo:

Trinity hi Lal Jesu Christa ziltilna pat in ki hechian ahi. Pa aum in, Chapa a um in, Thagau thiangtho a um ahi. A chuam chuam himaleh pumkhat ahiu ti hi Luka 10:22 na chun ..."Chapa chu kua ahem...Pa chu kua ahem, Chapa puandawna beplo lo ngal chun kuaman ahe puau hi".

Deut. 6:4; Exo. 20:3; Isai 44:24; 45:5,6 Juda miten Pathian khat cho a um hi ti hi a pawm tawp mai ui. Zawnei ten Pathian in hukdampa Messiah a piak ding a tiam dante, thagau thiangtho apiak ding dan te hi tamtak ala gen hi. Amabochu, Messiah Jesu

ahung piang phat in ala pawm kit ta puau hi.

Thuthunglui ah Trinity kimudan:

Pathian in min tamtak anei in, achang leh khat sangah tamzaw "Pathiante" ti'n, a changleh khatcho genna in amang sek hi, etsakna'n, Gen. 1:1 Hebrai pau in, Afil in Pathian in lei leh van a siam ah, ti hi zia "Pathian in" kiti hin **Yahweh, Jehovah** ti haw hi amang pua'n, **Elohim** a kimang hi. **Elohim** hi Pathian khat sang ah tamzaw genna a hi(Plural form ahi).

Gen. 1:26; 11:7. Pathian

in, I kibatpi'u in eima melpu'n mih-ing siam hitiu, atiu hi. Zia hin Pathian in "Eimau gual in" ti'n (plural mâ) ala mang hi. Zia hi Trinity pawmlo ten Angel te a genna ahiau atiu in, Pathian in Angel te tawh mihiam a siam khawm ngai puau, a ziak chu amau le Pathian thilsiam ahi tho hi (Rev. 22:9). Pa Chapa Thagau thiangtho khat hi chun a siam khawm ahiau.

Thuthunglui hun ahin Pathian khat ah mizia pathum nei ahidan a sulang zing a hi.

Sam 110:1 "The Lord said ti my Lord" Hebrai pau ah chun Lalpa tih 'Jehovah' a kiti'n, ka Lalpa kiang ah chun, ati ahin 'Adonai' a ki zik a hi.

Gen.19:24 'Lalpa chun van ah Lalpa kipat in, ti'n a gen hi'.

Gen. 19:24 ahin, Pathian in kei abul leh atawp ka hi ati'n, chang 16 na chun 'Lalpa'n ka thagau ei pia'n ati' a kimu kit a hi. Pathian khat cho ahi'n, Pa a um in, Chapa(lemna Lal Messiah piak ding atiam chu) a um in, Lalpa Thagau le a um hi. Amau sia hi a kibang pua'n, Pathum ahi vang un pumkhat ahiau hi.

Zia chu thuthunglui ah Trinity Bible ei zilti dan chu a hi.

Jesu Christa ei hildan:

Exo.33:18-32, Mosia in Lalpa Pathian kiangin lungsiat in la lopina(mel) eimusak in ati lai in, Lalpa chun 'Kuama'n ma mel amu ngai puai, a mute kuama a dam umlo ding ahiau a ti'n, Jn.14:8 ah Philip kiangin, kei leimu chun Pa melmu la hi ati piak ah, Pa Pathian hi khawvel ah mi kuama'n mukha nailo ahi. Pa mel mutheina lampi um sun chu Pa ai-aw ahung a chapa a hi. Pa ai-aw ahung Jesu chu Pa ahi ngai puai. Thagau thiangtho chu chapa ahi ngai puai, ahin pumkhat ahiau hi. Jn.1:18 "Kuama'n bangtik lai inle Pathian amu kha puau hi.... himaleh a chapa changkhat neisun Pa lunglam tawh kituak chun a chanchin a genchian hi".

Zilti na dikloten Pa Chapa Thagau thiangtho hi Jesu ahin, kilat dan chuam chuam ah kilang ahi atiu in, Jn. 5:26; 8:16-18 i et chun, Jesu'n keima ngen ka hi puai, ei sawlpa ka Pa a um hi.... Ka pa ei sawlpa'n le ka chungthu ma agen hi ati mai hi, amau te gel hi pumkhat himaleh apa hi a chuam (person) ahi dan tak a gen hi.

Jn. 14:28 ka pa chu keima sangin a lopi zaw ahi ati ahi.

Keima Pa tawh pumkhat ka hiu ti'n a gen zel hi (Jn.10:30).

Trinity pawmlo ten Jesu hi ama leh ama kisawl in agen un, ahin Jesu'n Pa kiang pauchap in nangin khawvel ah lei sawl in kenle amau khawvel in ka sawl a hi (Jn.17:18). Pa'n chapa a sawl gual in chapa'n le nungzuite a sawl ah, nungzui te kha Jesu ahi puau in, Jesu kha le Pa hi diaklo a hi.

Pa a um in Chapa a um in, Thagau Thiangtho a um hi. Trinity kiti English word umlo maleh Pathum kipumkhat chu Trinity ahi. Zia chu Bible in ei ziltil dan a hi.

Thagau Thiangtho:

Jn. 14:16, Jesu'n thamuanpa dang hun sawlpiak ding ka hi ati. Zia "Dang" ati hi Jesu kha ahi pua'n Thagau Thiangtho a genna ahi. Pumkhat himaleh "dang" ati hin a chuam ahidan a gen a hi (Rom.8:22).

*Pa leh Chapa pawmlote chu Pathian dodal ahi(Trinity) 1Jn.2:22.

*1Pet.1:3, I Lalpa Jesu Christa Pathian leh Pa chu pakin umta hen. "Jesu" leh "Pa" chu pak ding in a gen hi.

*Kol.2:9; Rev.1:8, Jesu a chun

Pathian hina bukim a um hi.

*Jn.14:10; 1Jn.4:14, Chapa hi khawvel hukdam ding sawl a hi.

Paul in Trinity ala ziltil dan:

1Kor.12:4, Lalpa vang chu pakhat ahi tipa hin Pathian khat in mi hindan pathum a umdan kichian takin a genlang a hi. 2Kor.13:13, Lalpa Jesu lungsiatna, Pathian hepina leh thagau thiangtho kithuapina chu la leng ua kiangin umta hen, Amen ti'n ala zik hi. Zia gindan a gen ahin ginlel ding neuca le a umlo a hi.

Thukhakna:

1Kor.13:9,10 Bukimlo in i hia'u ah, bukimlo ma'n i gensek sek ui, a bukim chu ahung phat leh a bukimlo hi sukbei hitan a. Paul ngeile Pathian thu hi he bukim in a kigel puai, a ziak chu Pathian thu hi mihing ten sûtzaw-sûtseng gual ahi puai.

Jn.3:16 ah Pathian in a chapa changkhat neisun khawvel in ahung sawl ah, bang ti dan ah Pathian ah chun Pa leh Chapa um thei ahem? ahiloleh mihingte pau(word) amat ahem? ti hi kuama'n ahe theilo a hi. Lalpa'n ziate chu a phuanglanglo a hi. Amabo chu hetttheina lampi um-

sun chu Pathian hatkhum Bible in agen cho hi i hiatthei sun ahi. Zia chu i pawm ngai a hi.

Bible hi i sim tak leh changkhat cho ahin pansan ah, Bible in agen na'i ti'n i dinpi ding ahi puai. A chunglam leh a nuailam in bang a gen em? ahiloleh bang zia ah zia hi kigen ahem? a context hiat masak a ngai hi. A chutiloleh, sentence khat mai pansan ah i gen ahi chun False teaching(ziltalna diklo) ahung hi thei hi.

Apostle te hunlai apat in Pa leh Chapa leh Thagau Thiangtho hi ala ging zing uhi buaina ala um ngai puai. Apostle te hun zaw in kochuam ah ziltalna diklo, thudik gual hitho- diklo, thudik chanve in ziltalna diklo kochuam in ahung lut phat in mitam tak asu buai ahi. Bible in Jesu Christa cho hi Pathian ahi- khatvei le ati ngai- lo ahi. Amabo chu Pa leh Chapa leh Thagau Thiangtho hin Pathian hina bukim anei chiat un, Pathian pathum hilo in pumkhat ahiu ti hi, Bible in ei hildan chu a hi. Bible in kichian takin ei hil zia ahin neucha le muanmaw ding umlo a hi.

Isai 5:13, ...hetna anei- lo zia kun, ka mite chu sal ah pui in a um tau in, a milian teu chule

gilkial in athi tau in, mipite chule dangchak in akeu zo tau hi.

Pathian thu Jesu Christa ziltalna diktak hi hethiam thei chiat ding in Lalpa'n ei malzawl tau hen, AMEN..!

--o0o--

“JESU HUNG KIT DING KIGEN MASA LEH AHUNG KIT NA DING ZIAK”

By: Samuel Satminthang Kipgen

□ AHUNG KIT DING KIGEN MASA:

1. Jesun a gen masa’i-

Mihing chapa chu a vansawlchakte tawh, a lopina kith-uam ah ahung tak leh, a lopina lalchutpha chung ah hung kichu’n tin;

-Matthai 25:31

2. Paul’in a gen masa’i-

I Lalpa’u Jesu khrista suklat ahi masia, thupiak chu buaklo leh dem bei in vawp zing in.

-1 Thimothei 6:14

3. Vansawlchakten a gen masa’i-

“ Ama lakto ah aum lai tak ah van lam a et zing lai un, a kiang un mi pani puan vam sil in ahung ding phut ziang tau a.

Amaw chun, ‘Galili mite haw, bang atia van lam en ah ding zing la hiu em? Zia Jesu, la kiang ua kipat van lam ah lakto ah um hi, van lam ah chiato la mu

gual ngei un hung kit ding a hi’ ahun tiu a”.

-Nas. 1:10-11

□ JESU HUNGKIT NA DING ZIAK:-

1. Ama ngakte hukdam ding-

Ziaziakchun, khrista chu mi tamtak gitlona zia kin khatvei piak in a um ta’n, a niveina’n gitlo paw ding hitalo in ama ala ngakte hukdam dingin hung kilang kit ding a hi.

-Heb. 9:28

2. A mite suklopi ah um ding-

“A mithiangthote suklopi ah um ding leh, ka hunt hu hiat-sak uh gin zia k ah a gingtute Zosia lamdang sak ah um ding ah ahung phat leh,”

“Chutia, suklopi leh lamdang sak a hitheina ding ah I Pathian in nangmau le ko tak him a hun sak theine ding leh phatnawpna Zosia leh ginna nasepna Zosia ah thilhitheina a hun

lawtin sak thein a dingin, ka hun pauchap piak zing sek uh a hi”.

-2 Thes. 1:10-11

3. Thil kiselgute chu vak ah hun takdawk ding-

Chutichun, a hun masang in bangma genchian ki’u in; Lalpa chun thim ah thil selgukte chu vak ah hun takdawk intin, lungthim ah tupnate le hilang ina. Zia phat chuleh, mi zosia’n Pathian ah kipat pakchak law chiat tan’au.

-1 Kor. 4:5

4. Thutan dinga hung ding ahi-

Pathian mitmu leh khrista Jesu, a thite leh a hingte vaihawm piak ding pa mitmu leh, a hung kilâkna ding leh a lenggam chu minsial in, ka hun tîl la hi.

-2 Tim. 4:1

5. Vaihawm dinga hungkit ding ahi

Chun, vansawlchak pasagina chun a pengkul chu a mut leh, van ah aw thupi tak ahung gi-
“ Zia khawvel lenggam hi Lalpa leh a khrista gam a hita hen; ama chun kumtuang in vaihawm ta’n a” ahun tia.

-Rev. 11:15

6. A kiangah um dinga ei pui ding ahi-

Chuleh, nang uh a ding ah mun ka siam leh, hung kit ing ka tin, ka kiang ah um dingin hung pui ding ka hi, ka umna nang uh le la umthei na ding un.

-John 14:3

7. Thina sumang ding ahitai-

Melma nunungpen sukmanthai ah um ding chu thina ahi. “Pathian in bangkim a keng nuai ah a chawtden sak tai” ti ahi ngala. “Bangkim a nuai ah chawtden” ati hin bangkim a nuai ah chawtdensakpa chu a huam puai ti a kilang hi.

-1Kor. 15:26-27

Simtute zosia Pathian in hun malzawl ta hen.

--o0o--

“CHATE Chunga Nu leh Pa Mawpuakna”

-The Boss translation

Insung'a chate chung'a hin nu le pan mawpuakna sang tak l nei un, ahinlah atamjawn amawpuaknau akihet lou ziak un a in sung uh a buai khawlaw in, Ziak achun chamna aum thei ngai lo ahii. Ziakiak achun bang hem l bawl tâk diu? l bawl ding uh chu, ti hin anuai ahin aban cha'n ala ensuk hitiu.

“INSUNG'A NU LEH PA BAWL DING TE CHU”

1. La chate lung siat un-

Tita 2:4 “Numei khangdawng nalai te chu apawsalteu hepi ding leh acha teu hepi ding in.”

2. La chateu chu khrista kianga pui un-

Matt.19:14-15 “Himaleh Jesu'n ahet phat in, Naupangte kha ka kianga hung sak unla, ala zada ki'u in: Vangam chu zia taw bang mite a ding chu ahi ngala”

3 La chate chu Pathian thu gen inlang hil zil ziang in.

Deut.6:6-7 “Zia thute, Tuni ka hung thupiakte hi la lungthim un vawp zing un, In ah la um unle, Khual gama la um lai unle: La lup unle, La thawdaw unle la chateu het ah la gennawn zing ding uh ahi.”

4. La cha teu pathian thu anun na ding un hil un.

Deut.32:46 A kiang un “Tuni la kiang ua ka thu hun hiatsak zosia ahin la lungthim uh ngadet un lang, Zia dan thu zosia hi gunchu taka zui ding leh bawl ding in la chateu thu pia'u in”.

Isai. 38:19 “Pu leh pate chun la ginum zia, a chate'u kiangin ahil sawn ui.”

5. La chate chu thunun in-

Prov.19:18 “Kinepna aum lai in la chate thunun inla, siatna tuak ding bep in ngaitua kin.”

Prov. 29:17 “La chate thunun leh chin chawldamna hun pian tin la lungle dam in a.”

Prov.13:24 “Chate vawlo chu a dawisak lo ahi'n A dawisak te chun vang gunchu takin athunun sek ui.”

Prov. 23:13,14 “La chate thu nun

ki padam kin la, mawl in zep le chin le thi ziang puan'au. Mawl in zep le chin sheol ah kipat huk-dawk zaw hi ding la hi ngal a"

6. La chate chu A um dingdan kilawm tak in puihuai in.

Prov.22:6 "Naupang te chu lam-dik hil leh chin, ahung upat nung tiang unle petmang ta puan'au."

7. La cha te chu su nuak kin la, Lung le lungnat sak kin.

Kol.3:21 "Pate haw la chateu hi nuak ki'u in, Chutilochun, Lungthu-ai kha'nau."

Eph.6:4 "Ahi'n, Nanghaw pate haw, La chateu hi'lungna kiu inla Lalpa thununna leh zilgaina achun kaihuai zaw tau in."

8. La chate kiang in pathian nasep dan te genzing in.

Ex.10:2 "Chu leh la chate le la tute tiang in Aigupta te bang gual ah ala sawisa ka hem ti leh, alak ua thilmak ka bawl te hi la genthei na ding leh, Keima hi Lalpa chu ka hi ti a hetthei na ding un" atia.

(Sim be in, Psalms 78:4)

9 La chate kiang in Pathian thutan hungtung ding chu hil in.

Joel 1:3 "Zia chu la chateu hil

unla, La chateu in amau chate chiat hilsawn uhen la amau chunle akhangsawn teu hil sawn chiat uh hen."

10. La chate chu la thu nun sak in.

1 Tim.3:4,12 "A ma insung phat-ak a pawtup in a chate chu kawng bangkim a thumang leh za um taka athunun zaw ding ahi."

11. La chate malzawl na pian.

Gen. 48:15 "Joshep chu a malz-awl ah."

Ei suante Abraham tawh Isak ma-ang ah umsek Pathian, tuni tianga eiching zing pa Pathian;

12. La chate lainat in-

Ps. 103:13 "Pa'n a chate alain-at gual in, Lalpa'n am alau te a lainat hi.

13. La chate Go hawp piak chiat in.

Job 42:15 "Zia gam sung zosia chun Job chanu te tuka melpha nu-mai aum puai; Chuleh, A pau chun a suapiu pawsal te taw go a chan khawm ding un a piat."

(2Kor.12:14;1Tim.5:8)

14. La chate zi ding tel piak in

Gen. 24:4 "Ahi'n Ka gam lama,

ka chanau te kianga chia inla, zia kipat chun ka chapa Isak ji ding lava pui ding ahi, ti la ki haksial ding ahi,” atia.

(sim be ding. Genesis 28:1-2)

15. La chate chu zingkal nitak in maicham siampiak zingin

Joshua 24:15 “Tu’hin Lalpa nasep ding chu nuam la hiu leh, Tuni ma mahin kuapen nasep ding la-hiu em, Lapu la pateu in luipi gal lama Pathian ten a al sep piak uh ahi em; Ahiloleh lalua nau gama Amorte Pathian ahi zaw diam, Ti tel ngal un. Kei leh ka inkuante’n vang Lalpa na bep sem ingkau, ti a dawnhu a.

E.g:- Job, Abraham, Jacob
(Job 1:5; Gen. 12:7-8; Gen.35:2-3)

Note: Zingkal nitaka Insung maicham siam zing te chu akim vel ua cheng mite haw chun alau ding uh ahi(Gen.35:5).

“The father, or in his absence, the mother should conduct the worship, selecting a portion of Scripture that is interesting and easily understood. The service should be short.” - Cch, P.153

Insunga Nu leh paten isep ding ua kilawm Pathian in eipiak te haw diktat a isep uchun I insung uh hung nuam intin chu leh ilak ua Pathian le hung thanuam ding ahi. Chuleh, Insunga chate haw hi hukdam ah au leh umlo ding uh Nu leh Pate khuta kinga ahiziak in bang ti la etkawl ding ahi diam ti phatak cha la ngai tua angai hi.

Thukhakna: La chate chung a la sep dingawl la sep lo a la chaten thagau lama thina atuak khak uchun Pathian in la chung thu hung tan ding ahi.

Zia ziak achun ichate chung a sep dinga kilawm pathian ineipiak te hi chingthei tak in sem ding in nu leh pate zosia pathian min in iki chial uh ahi.

Asim zosia pathian in hung malzawl ta hen.

Khrista lekhathawt I hiu hi.

DIK LASA EM ?

By:- Rev. N. Dalla

1. Numei hi a chuam mawng mawng ah ki siam hilo in, pawsal apat ki ladawk ah siam ahi ziakin, pawsal ah a kile kît masia buting thei ngai ngailo ahi.
2. Pathian in phalo a sak masakpen chu pawsal ama ngawn ah a um hi ahia, a ki thuapi tu ding numei a nei masang sia chu bukim thei diaklo ahi.
3. Numei leh pawsal hi a kicheng ding mawng ahi ti manzên ah, ki en det detlo ah ki mawkchên ziang te'n Pathian thuthung a bawtsia kît zawu ahi.
4. Numei te'n a pawsal teu thunuai ah ki tuklût haksa asa ten nau ah, Khrista'n a kochuamte ahepi â a thasâng ah a kipiak gual ah pawsal te'n a zite a duat ah a hepi ding ti thupiak hi haksa zaw ei vei..!
5. Khawvel bei ding kuan lam ahin, gam leh nam ngaina leh phung leh châng ngaina hung tam deu deu ding hileh a kilawm hi.
6. Gam zosia neipa, nam zosia siampa, khawvel leh a sung ah um zosia siampa Pathian sâng ah a thil siam haw ngaina ah a hinna phal hial hial ah ki pedawk ngam a ki tam deu deu ta ahi.
7. Jesu â dia thi ngamlo, kochuam â dia thi ngam, gam leh nam â dia kipe phal, Jesu â dia kipe phallo tite haw hi hung tam deu deu ding hileh a kilawm hi.
8. Paul in Timothi kiang ah “mite'n thuhilna dik a ngaithâk peilo hun hung tung ding ahi” ala ti kha tu'hun ah hile a tung ma a hi ta diam? ti'thei in a um ta ahi. (2Tim.4:3)
9. Khangkhat hi i ngaitua tua leh sawt tak ding gualin i zuk ngai khasek ua, sawt kêilo ei vei..! a hât pen ah kum sawmsagi, sawmgjat ti vêl bep po hi ei vei..!
10. Eimau khang chiat hi mangdik vek leu hin, buaina ti haw hi umlo mai ding ahia, a ma khang mangkhial ila umkhâk sek ziak ua buaina kiti haw hi umkha hisek zaw ahi.
11. Tu khang ah i buainau hi khang masate'n a mau khang ala mat khial ziak uh ala hideu tei tei sek ahi.

12. Khangkît ding hi pha hen i tiu ahi chun, tu khang hi sukdik a ngai ah, tu khang i sukdik lo ua leh khangkît le buai tho tho ding ahi, ti'na himai ahi.
13. Mizosia hin phatna leh phatlona i nei kawp vek ua, i phatlona chu phatna ah i zaw chun, mi-pha gual in i kilang sek uh ahi.
14. Mi'n a phalo ding gual ah ei ngai man ua phalo ziang i hi puau a, a pha gual ah ei ngai man ua le pha ziang kihi diaklo ahi.
15. Mi i mu'dan u hi a phalo zawng ah i mu'u chun, a mi kha phalo ziang hilo in, i mu'dan zawk kha a diklo ziak ah phalo lim ah i mu khâk hisek zaw ahi.
16. Khawvel ah mu'da neite khêl ah mi genthei a um puau ah, i mu'dan te'n bangma he phalo, ei mi muda tu chuh a gen ah ki genthei, zia gual mi chu mi lungsiat umtak ahi.
17. Galili gam kana khua kichenna gual vakna ah Jesu leh a nungzuite ala chial ua (John 2:1,2) tulai nupa'n tamtak kichenna ah Jesu ki chiallona tam hiding ahia, nupa'n buai a tam tau ahi.
18. Kana khua mo lawmte khan, uain tâksap ding lau ziak ah Jesu chial hi khello maleu, uain a tâksap phat un Jesu a chial ukha a mau â dia malzawlina nâk a hung hita ahi.
19. Mi tamtak hin neizaw hun leh, hi'thei lai hun ahin tasam ziang thei di'n a ki gingcha ngai puau ah, maleh, i lungthim kipak leh i nawpsak lai tak hun ziang ahinle, tasam ziangthei kihi ala hi ei vei..!
20. "Lalpa hawlte chun vang thilpha a tasam ngai puau" ti ahia (Sam 34:10) eilawi chu Lalpa hawllo ah thilpha tasam lo ding lunggulte ila hi khasek uh ahi.
21. Lui hi a luang ahi pua, tui hi a luang a hi zawk gual in, hun hi a bei a hi pua, i hinnau hi a beisek hi zaw ahi.
22. Hun hi a bangtik lai inle a ngai ngai in a um zing ah, a mihingte hinkhua hi vâng a ki sâng danglam zung zung sek ahi.
23. Thil zosia hin umpat hun a nei vek ua, himaleh hun hi bangtik apat um pan ahi tam ti kua-ma'n i hethei lo uh ahi.
24. Hun hi a vêl vêl in umthei lele i hinnau hi a vêl vêl in a umthei ta pua, hun um lele i hinnau a bei chun, hun umlo ki suak ziang ahi.

“La thilbawlte chu khangthak zosia’n, gen sawn intiu in, la thilbawl nasa takte chu gen-sawn zel hi’n a.” (Sam 145:4)

Ziktu: Rev. D. Robert Thanga

Thumapui: Leichung khawvel ah Pathian gam a ding a i nasep-nau, Khuga Sadar Presbytery tha sang daltu ding Central Khristian Khanglai Pawl (CKKP) in, Golden Jubilee, Leilon Vaiphei vangkhua, Pathian Thagau pawlna tawh gual leh pai, kipawl khawmna hun nawp tak a mat ahi. Pathian I pakkhawmna teu, liam tasate, vak nung thil kit in, bangkim i bawl zosia te khan, lungthim a suthak in, lung a suleng khawp mai hi. Hun chiasa ko kit thei talo, i lim khawm ni khua te haw kha, Aw Khanglai chanpi ten vak nung thial kit tiam un.

- i) Awle, zia Golden Jubilee I mat lai uh khan bang la gel em?
- ii) Pathian thu leh la ingai thak teu kha la vawp phat uh a um na lai em?
- iii) Pathian kiang a la kipak na ziak ah ginna thutiam la ki tiamna teu haw kha la he zing na lai em?

Golden Jubilee thupi Sam 145:4, “Lalpa thilbawl chu khangthak zosia’n, gen sawn intiu in, la thilbawl nasa takte chu gen-sawn zel hi’n a.” ti gual a khan, bang tiang la mawpuakna la lawtin sak ta em?, ahiloleh Setan in a lak piak khapal tam? Bang dinmun in la um em...? Kingaitua thak chiat hitiu.

Sam bu (pakna late) hi kuate zik ahem?

Sam bu ziahtu hi David, Asaph, Korah chate, Solomon, Heman, Ethan, Mosi, Ezra leh mi dang 49 vel mi chuam chuam a hui ah, zia lak ah chun a ziak tampen chu Lal David hi ahi. David la phuak zosia chu 73 a hi.

Tuchun ah Golden Jubilee thupi ding a **Sam 145:4** na hi David La zik lak a nu nung pen le ahi.

Zia Sam bu a laa haw hi 1400 B.C. kipat 430 B.C. sung ah kiphuak a hi. Zia laa haw hi Pathian pakna la leh Pauchapna la ahi. Zia Sam bu (pakna late) haw hi bu nga in a kikhen ah, bu

khatna chu No.1-41 a hia, bu nina chu No. 42-72 chan a hia, bu thumna chu No. 73-89 a hia, bu lina chu 90-106 a hia, a bu ngana chu No. 107-150 ahi.

Sam 145:4

I hiat tak sa gual un Sam 145 nan hi Pathian lopi dan leh Phatna, Pakna ti'n thupi le kawi ahi (Bible Society of India). David hin Pathian nasep lopi tak, ama khang ah mu ahi. **Deuteronomy 4:9,6:7** a imu gual un, Nu leh Pate hawn, la tûteu leh la tûsawnteu tiang in hil unla, ti'n la gen ahi. Sam ziktu hin, Pathian lopina, kumthuang pa, hepitu Pathian a hinate, Paktâk Pathian a hinate leh kumtuang ah, dang lam ngai lo Pathian ahi dan, amuchian in. **Jakob 4:14** achun mihing hin khua tihin la gen ah "Sûm chawmcha khat sung a hung zîng ah, a mangkit zing gual bep la hui" ti'n ala gen hi. Pathian a hi leh vang, Alpha leh Omega (bul leh tawp) kumtuang Pathian ahi dan a genchian mama hi. David in, bang ma ahi lo dan aki het chian ma ma ziak in, Pathian lopi na achung ah a lat sak zaw thei ahi. Khang chia tasate a et inle, Pathian chu ala um zing

ah, a hun mat zing lai te a en ah, Pathian chu a lopi na taw ala um zing tho ah, hun hung tungkit ding a le, Pathian chu a lopi na taw um zing ding a hi ti amuchia ahi. Pathian chu Kumtuang Pa, danglam ngai lo ahi dan a tak lang ahi. Sam 22:30 achun, "Suan zosia kiang ah Lalpa thu chu gensawm hin tin, khang thakten Lalpa na sem innau" ti'n ala gen hi. Ziaziak chun Pathian hepi na chang in CKKP Golden Jubilee Lalpa'n hepi na zalin kipak tak mai in mang zou thei ta, puitu masa te'n amau hun a, gim leh chawl gen lo a, gaw nuai, dai kai nuai ah Lalpa na ginum tak mai ah ala sepna teu ga sua in, tuni hun lopi tak mai i tung thei tau ahi. I puitu maseten chanchinpha ala gensawm uh, Central Christian Kanglai Pawl mangcha, kipak tak mai a, Pathian lopinate, danglam ngailo leh kumtuang Pathian na ala sepna hun u chu a liam ta, tuhun ahin, nang leh kei liangko in ahung ki nga tha tai. Zia chanchinpha gensawmna chu, i mawpuaknau ahi, sem zawmding in, khangthak ten khapet zen ah pan ilak uh ngai ahi. Lalpa apat malzawl na i dawn teu: lekha thiamna kong a te, khut thi-

amnate leh kawng chuamchuam ah ei malzawlnate hi, Ama lopi-na puan zakna a mang ding in iki chial uh ahi. Tuhun ahin nang leh kei i um ziak un, Pathianin Vanah mite leh Vangsawlchak tamtak te, a chanchinpha puang zak ut ma leu, hung sawl lo in, aziak chu, nang leh kei i um ziak uh ahi pen hi. Ka khanglai chanpi te'n tu hun Pathian ei pui tung hi aziak aum ahi. Matthai 28:19 achun, "chia un la, nam zosia chu ka nungzui ding in hun siam un" ti ahi. Zia thupiak chanchinpha nasep na lam a, tusang a hat zaw sem a pan la ah, lungthim leh taksa lam ah thei tawp sua a, na sem ding in iki chial nawn nawn uh ahi.

Thukhakna:

Awle, Khanglai chanpite, CKKP Golden Jubilee chu taksa leh Thagau ah lawk tak ah i mat chiat uh ka gingcha ahi. Jubilee mat hung lai ah mimal tin; la kiti- tiam na teu, su piting ding a, a diak a ginna thutiam iki tiam nau teu mimal tin in, i piak zel dan teu kha, ka la hiat in Pathian kiang in tam vei tak, kipak thu ka la gen zing sek hi. Zia ban in khaw- mpi hun ah thupuk na i la bawl uh, Mission field work camp nei

ding haw bang supi ting thei ta ding a pan ilak dan teu, Income Generating Project (IGP) Jubilee veng a sa pan thei ta ding a, Inn foundation chaw pat ahi tak dan vak hiat in kipak um akisa ma ma hi. I khawmpi thupi, Sam 145:4 pansan ah i Central Khris- tian Khanglai Pawl (CKKP) in, zia i Jubilee mat au pat hin Pathi- an chanchinpha ahat zawk sem a gensawn zel thei ding in i kitil kho nau Lalpa'n ei malsawm piak a, atak ah i sep thei ziak un a lopi tak zet ahi. Pathian Lalgam keklen zel thei ding in, Lalpa'n ei malsawm chiat tau hen.

[extracted from CKKP Golden Jubilee Article]

--o0o--

Presbytery sung thu chuam chuam – Nov. 2022

1. Dt. 29th Sept. 2022 nin L. Mission Veng P.C chun “SILVER JUBILEE” a mang un, Rev. S.T.Kaia Vaiphei, Administrative Secretary PCI Shil-long in, thupi “Zia chan hi Lalpa’n ei puitung ta a hi” -1Sam.7:12 mang in Pathian thugenna nei in, Kipakna Ankuang sawkkhawm in, taksa leh thagau ah lawktak in a mang zo ui.
2. Dt. 30th Sept. 2022 ni’n PWF(KSP) in Tispari Mission Field ah Zing-kal Anngawl Pauchapna anei un, District tin apat in member 210 te chiakhawm in lawktak mai ah hun matzaw a hi.
3. Dt. 1st - 2nd Oct. 2022 sungin Tuithanak District, Saipum P.C ah “REVIVAL” Prog. mang in, Evan. Pautinlam (Tispari M/F) in Revival Speaker hina la’n Program amang zo ui.
4. Dt. 10th Oct. 2022 ni’n Tispari M/F mun ah M&E Workers Retreat Programme nei ahin, Resource Person in Rev. Lalthantluanga, Exe. Secy. Manipur Synod pang in, M&E semtute leh Committee member te pang in hun mat zaw a hi.
5. PWF(PCI) in Consultation on Empowering Women in the Ministry ti thupi mangin, Lailam Veng P.C (Zou Synod) ah Dt. 19&20 Oct. 2022 sunga um chu, ei PWF(KSP) apat in Nu D. Melody(Secretary), Nu Ngaineihat(Treasurer) leh Nu Tingnu(Finance) te ava pang thei ui.
6. Tutha(October) 2022 sunga Khawmpi chuamchuam umte:-

	KKP Khawmpi	PWF Khawmpi	Dist. Khawmpi
Sadar Dist.	<u>52nd vei na,</u> at L. Mission Veng P.C “Lalpa lau hi pil- na bul ahi” -Prov. 9:10	Seminar cum Kisukhalna Topic- Presbyterian- ism, Chate etkawl ding dan, Resource Person Rev. Lien- thienmang.	<u>62nd vei na,</u> at Awlmun P.C “Keima’n ka Belamte hawld- awk ding ka hi” -Ezk.34:11

	KKP Khawmpi	PWF Khawmpi	Dist. Khawmpi
Khuga Dist.	<u>52nd</u> <u>vei na,</u> at Zikpi Tampak P.C “Nunglam enlo in” -Gen.19:17	<u>51st</u> <u>vei na,</u> at Leisang P.C “Pathian thil-hitheina, hatlo-na subukimtu” -2Kor.12:9	<u>52nd</u> <u>vei na,</u> at Phuaisanphai P.C “Khawitak ah um la hem?” -Thil.3:9
Town Dist.	<u>8th</u> <u>vei na,</u> at Tuikhram P.C “Man piak ah chawksa la hitau hi, mihing suak in lut-kit ta ki’u in” -1Kor.7:23	<u>8th</u> <u>vei na,</u> at HQ. Tuibuang P.C, “Lapuan Inmun keli-an in” -Isai 54:2.	<u>8th</u> <u>vei na,</u> at Nghathal P.C “La gam hungtung hen” -Mat.6:8
Tuithanak Dist.	<u>53rd</u> <u>vei na,</u> at Saipum P.C, “Kuama’n amading bep enlo in, midang ah ding le enzaw hen” -Phil.2:4	<u>53rd</u> <u>vei na,</u> at Tangmual P.C “Kei leh ka inkuante vang lalpa na ahi ka sep ding uh” -Josh.24:15.	<u>60th</u> <u>vei na,</u> DIAMOND Jubilee at Bisanmual P.C, “Diktatna” -Amos 5:24

--o0o--

HIAT DINGA PHA
(Based on the Bible BSI publication)

~by Tv. Daniel, Tangmual

**THUTHUNGTHAK (NEW TESTEMENT) SUNGA WORDS TAMPEN
TE:**

S/No.	Lekhabu	Bung leh Chang	Words zat
1	Matthew	23:23	259 words
2	Mark	16:8	296
3	Luke	10:21	231
4	John	19:38	203
5	Acts	14:15	260
6	Romte	2:1	233
7	1 Korinth	12:28	247
8	2 Korinth	7:12	188
9	Galatians	2:16	245
10	Ephesians	4:11	173
11	Philippians	1:27	210
12	Colossians	1:23	168
13	1 Thessalonite	2:13	183
14	2 Thessalonite	2:13	173
15	1 Timothy	6:2	165
16	2 Timothy	3:11	161
17	Titus	2:5	143
18	Philemon	Chang 16	139
19	Hebrews	7:11	216
20	James	4:11	155
21	1 Peter	4:11	195
22	2 Peter	2:1	199
23	1 John	5:16	212
24	2 John	Chang 12	148
25	3 John	Chang 10	160
26	Jude	Chang 4	177
27	Revelation	20:4	254
<i>Mark 16:8 na hi a tam pen hi.</i>			

PHUNGVUKTUTE KIANGA HIATSAKNA

Damna Aw ngainatna ziaka Phungvuktu (*Petron, Supporter, Memorial Gift & Encouraging*) ah pangtute zosia chung in kipak thu ka hun gen hi. A term a bei tak ziakin, a list hi Update a kibawl zaw nunga hung kisulang ahia, ziaziakachun ngaina-simtute zosia'n DAMNA AW hi hung Phungvuk zawm zel dingin la tawmngainau ka hun don hi.

~Editor.

--o0o--

'DAMNA AW' PHUNGVUKTUTE :

PATRON MEMBERS :

1. Tv. Daniel Tangmual

MEMORIAL GIFT :

1. Pi Deem Melody, **Central Church, (Rengkai)**
[in loving memory of (L) Upa Lamthianlal]

ENCOURAGING MEMBERS :

1. Upa Kaizuanthang Tangmual,
2. Pu Goumang Tangmual
3. Upa Tongneilal Leilon
4. Upa Henkholam Kangvai
5. Pu Lianbel Lingsiphai
6. Pi Niangphal Bisanmual

Damna Aw monthly magazine hi tutiang ahin kochuamte'n phungvukna i bawlte'u ziaka hin chiazal i hiu a, kuale phungvukna bawl utte a ding in bangtik lai in le bawlthei zing ahi.

- (i). Patron member- Kum 3 (three) a ding in. ₹. 3,000/-
(ii). Memorial Gift- Kum 2(two) a ding in. ₹. 2,500/-
(iii). Supporting member- Kum2(two) a ding in ₹. 2,000/-
(iv). Encourager- Kum 1(one) a ding in. ₹. 1,000/-

Chun, sum thawt nuamte a ding in:

A/C name: Khuga Sadar Presbytery(MPCS)

A/C nos: 32483318505

Branch code: 6182, CCpur

CIF nos: 86412486695

IFSC nos: SBIN0006182.